

FJALA E DEPUTETIT PETRIT VASILI

E ENJTE DATA 08 QERSHOR 2023

E nderuar drejtuese e seancës,

Të nderuar kolegë,

Absolutisht do të kishte qenë një ditë me goxha debat sot, nëse do të kishim pasur një raport tjetër e nuk do të kishim këtë rutinën e vazhdueshme, që ne dëgjojmë nga institucionet e pavarura, të cilat qartësisht, me mënyrën si raportojnë, me mënyrën si i drejtohen Kuvendit, tregojnë se fjala pavarësi për ta është e ndaluar, ndërsa varësia absolute, e hapur, pa asnjë hezitim nga ata që zgjedhin është pikërisht misioni i vetëm i tyre. Në tërë botën e qytetëruar, por edhe në këtë Ballkanin tonë të vogël, të tëra këto institucione janë gjithmonë ballë për ballë qeverive, se, në fund të fundit, ato janë që kanë kompetencat e mëdha, administrojnë prona të mëdha, administrojnë interesa të mëdha të shtetit, e natyrshëm janë ato që janë në vëmendjen kryesore. Ndërsa ne këtu kemi institucione të pazëshme, nuk i prishin punë njeriu, si e thotë populli: “Hanë përshesh”, nuk bëjnë asnjë dëm. Në një situatë ku një nga problemet më të mëdha është transparenca zero, sepse transparenca zero është pikërisht aleati më i madh i korrupsionit, e ku duhej të gjëmonte e bubullonte evokimi i kësaj të drejte dhe mbrojtja e saj, të qëndruarit shumë fort e qeverisë për çdo herë që e mohon këtë të drejtë, përkundrazi qeveria ka një aleat ligjor të mrekullueshëm që nuk i krijon asnjë shqetësim dhe e lë të jetë fare e qetë. Me kërkesat pa fund që bëhen për informim, për të hedhur dritë mbi atë korrupsion të tmerrshëm, për të cilin na vjen lajmi nga Europa, por ne duam ta zbulojmë këtu, nuk kemi pse t’i marrim lajmet që andej, nuk ndodh asgjë. Shikojmë një raport, patjetër rutinor, mbushur me llafe plot. Janë gjëra që nuk kanë as ngjarje dhe as lajme, sepse në fund ka një shumatore: e drejta e informimit dhe transparenca në këtë vend janë një pikiatë, që shkon poshtë e më poshtë. Është fare e vërtetë, që ne e pamë edhe në zgjedhjet e fundit, të gjithë e mbajnë mend, pas një batërdie në përdorimin e të dhënave personale, por batërdis që iku nga kufijtë e Shqipërisë dhe mbushi parlamente europiane, në Shtetet e Bashkuara të Amerikës u bë një ngjarje botërore, komisioneri reagoi më 11 maj për mesazhet e kandidatit të opozitës në Tiranë. Ishte shqetësim i madh, sepse kishin vajtur disa mesazhe, ndërkohë që batërdis mesazhesh vinin nga pjesëtarë të mazhorancës në fushatën elektorale, më 11 maj u bë reagimi. Ky ishte shqetësimi, se mos ky mesazhi krijonte ndonjë shqetësim në ecurinë e zgjedhjeve.

Në fund të ditës, a besohet më kjo lloj gjëje? Po vij te rrethanat konkrete. Konkretisht, unë kam pasur vetë një histori personale me këtë institucion. I jam drejtuar në mënyrë shumë të rregullt për një vonesë të pajustificuar dhe skandaloze që më bëhej për t’u informuar nga Bashkia e Tiranës, nga kryetari i Bashkisë. Iu drejtova institucionit, i cili në raport me ligjin, shumë mirë, unë i duartrokas ata që zbatojnë ligjin, më kërkuan të mbush edhe një formular, korrekt, siç e kërkonte ligji, së bashku me ankesën përkatëse. Patjetër që, me durim, e përmbusha edhe këtë gjë. Vonesa dhe mosdhënia e informacionit ishin skandaloze, të gjitha afatet u dhunuan në mënyrë të turpshme. Pasi e dërgova kërkesën, që atëherë një heshtje e tmerrshme, heshtje varri ka rënë dhe asnjë gjë nuk ndodhi, prisja me padurim që të kishte një reagim të rreptë. Çfarë është kjo? Deputeti, i cili ka dy mundësi, për statusin e tij dhe për ligjin e informimit, të kërkojë një informacion dhe nuk i jepet ky informacion dhe

Komisioneri nuk shqetësohet, ndonëse ligji e ka vënë që të jetë çobani i kësaj gjëje! Po këtij çobani, siç duket, ato dhitë e ligjit i kanë ikur tutje dhe e rëndësishme është që të mos e shqetësojnë. Pyetja është shumë e thjeshtë: po çfarë mund të arrijë media? Çfarë mund të arrijë qytetari i thjeshtë? Po çfarë mund të arrijnë të marrin subjekte të tjera të interesuara, kur fare qartë dhe pacipësisht deputetit i rezervohet një qëndrim i tillë?! Ndaj është e qartë, aleanca e institucioneve të varura kokë e këmbë, servile kokë e këmbë, të përkatësuar partiakisht, pra ajo parti që më zgjodhi mua, unë e kam për zemër dhe nuk i krijoj as shqetësimin më të vogël, është sigurisht misioni, mënyra, mesazhi më i shëmtuar dhe më i keq që mund të jepet për ato të ashtuquajtura institucione të pavarura, të cilat duhet të ishin edhe zëdhënëse të qytetarit të thjeshtë për mbrojtjen e të drejtës së tyre për të qenë të informuar. Faleminderit!